


徐州使诗徵

张伯英 甄选
徐东侨 编次
薛以伟 点校

下



广陵书社

徐州续诗徵

(下) 藏书专用章

张伯英 甄选

徐东侨 编次

薛以伟 点校

徐州续诗徵卷十二

丰

袁遵道

叔正。元封汝南郡公，谥文靖。

【校勘记】谥文靖：“谥”底本误作“谧”。

厌气台

西出咸阳驾上东，苍生辛苦恨遭逢。古来有德惟天命，厌气台空夕照中。

王 正

惟中，号秋林隐老。洪武初以宋濂荐明经，任翰林孔目，升泸州知州，调嘉定州。

高祖故宅

汉皇千古一英雄，休笑当年马上功。试问后来为帝者，谁人曾出范围中。

裴 纪

克振。弘治辛卯举人。河南钧州同知。

登鼓楼

眺望丰城百尺楼，四边风景豁吟眸。自从汉祖龙兴后，王气当今天子收。

李 琼

元贵。明正德间归安县丞，祀乡贤。

丰沛道中即事

王孙无地策坚肥，渺渺渔人失钓矶。浴日波光真是大，凌晨岚气杳还非。蒿莱蔽野难供税，鸥鸟无心却绕飞。多少丰中待哺者，芦花大半制为衣。

蔡岳佐

明正德间贡生。

泡河

泛泛洪流接远沙，郊原无复种桑麻。堤横夕照游寒兔，树带晴云噪暮鸦。林外荆榛高帝宅，水边篱落野人家。中阳往事君休问，惟有渔翁舣钓槎。

刘见龙

明嘉靖间贡生，大名训导，肃州卫学教授。

天津晚钓

云汉悬河九曲横，仙槎碧落古丰城。想因地泽通灵脉，由此天津得令名。飞鸟归栖惊午夜，渔翁徙倚忽三更。等闲钓罢秋江晚，一笛清风觉有情。

张盛治

德甫。万历恩贡生。任应天府训导、陕州学正、太平府教授，摄溧水令。著有《粉榆正续集》。

天启二年十二月十七日寓姑孰逢宸男自丰至语妖寇有感而赋

小饮二三子，当门有几步。喜深招之人，惊心问其故。贼徒作何状，风雨争驰鹜。所至遭焚劫，安堵失其素。吾邑坐弹丸，雉堞非孔固。吾家如栖鸟，摧残虞日暮。逃难纷如织，奔命争先赴。人禽俱骇散，百里断烟雾。仓卒拙人谋，欵忽感天祚。南北大兵合，天戈时雨布。一战戮鲸鲵，再战翦狐兔。三战荡妖氛，輜重获无数。杀声震地来，原野肉交互。渠魁既已歼，胁从谁能顾。可怜愚夫妇，并命已成聚。母死不顾儿，儿仍哺母乳。语次一及此，四座泪如注。嗟哉无禄民，谁使遭其蠹。抚字不劳心，教化非所务。但知饱囊橐，钱粮加耗足。民困不知恤，民乱不能措。坐视人命残，甘心人国误。不佞亦有言，闻寇七字赋。豺虎未可嗔，催科鸡犬惧。所以闻儿说，展转寐成寤。功则归熊黑，罪专在吾属。定乃愈知痛，生还念死趣。寄语峨冠者，休堕沉冥路。

史文燿

五聚。崇祯己卯举人。

高祖庙

汉帝威仪俨在兹，寒芜漠漠野烟驰。当时约法除民患，不独兴王见地奇。过吊纷来披野棘，咄嗟难办起荒祠。空堂袞冕苔销尽，啼鸟吟蛩总涕洟。

苏 莪

万历间选贡。池州府教授。

泡水波光

数顷烟波一望开，渚清沙白净无埃。日光潋潋涵金镜，又见骊珠夜月来。

史闕疑

养虚。万历间贡生，为武昌教谕，摄邑篆。

圣井春游

春水新添数尺泉，游人遥望辘轳悬。何年试汲为霖雨，天下苍生待济川。

张 型

世章。岁贡生。任巢县训导。

杏花村

杏花簇簇绕村红，细雨轻烟图画中。沽酒行人何处觅，隔林露出一帘风。

秦台夜月

自古秦台明月好，如今磨灭已无台。青天不管沧桑变，夜夜月明依旧来。

史应祯

廩生。

文明晓市

文藻当年重汉京，阴森槐市晓风清。环桥此日纷车马，共识弦歌在武城。

李执中

娥墓秋容

玉女神游锁碧封，寒烟衰草乱哀蛩。秋来山色凝青霭，犹似当年翠黛浓。

李 澳

武修。诸生。

经阁蟾光

晴光万顷玉轮高，露湿阑干冷兔毫。却怪檐前星斗动，青藜此夜照金刀。

袁本厚

诸生。

龙池春水

荡漾东风动碧纹，满堤杨柳满溪云。春来日暖桃花浪，惊见骊龙五色文。

刘运魁

际可。贡生。

凤塔秋风

雁塔曾题京洛名，秋高此地凤凰鸣。凭将万里长风翼，飞向瑶台弄月明。

崔连云

云横。诸生。著有《天问阁稿》。

阎侯甘棠吟

专符百里绶花浓，恺悌贤声万井通。桃李香来风细细，桑麻绿遍露蒙蒙。独悬冰鉴甄流品，时借秋霜运化工。最是萑苻今息警，弦歌终日御薰风。

董汉儒

贡生。

甘棠吟

春来喜气动华嵎，露冕郊迎仙令骖。奉命为郎堪寄百，好生解网幸开三。眼前泽柳荫彭北，日后甘棠歌召南。陌上人间吏不

扰，隰原处处有耕男。

张 基

贡生。型之弟。

甘棠吟

占年未慰三农望，祷雨真悬万姓忧。和气前朝逐马动，惠霖今夜傍龙游。遥沾芳树轻如雾，尽入平田细不流。莫道春当甲子日，天心原自答君侯。

王缉敬

甘棠吟

寒夜曾陪宿戍楼，只今犹自忆嘉谋。声喧中泽千鸿集，险设重关百雉修。碧草软尘闲试马，林花过雨看驱牛。春风吹得江淮润，沛水何缘占上游。

尹 圻

甘棠吟

曲江曾试五花骢，帝简经营宇县中。日暖千村鸠唤雨，春阴四野燕翻风。莎痕叠叠官衙寂，草色萋萋囹圄空。自此潢池绥德化，烽烟无复照山红。

李 庄

甘棠吟

霜肃一堂除弊政，春来百里布和祥。神情清入貌姑射，仁惠

留看蔽芾棠。尝引饥寒问妇子，却将保障答君王。三年雨露回凋瘵，重见文川与武乡。

章生铤

甘棠吟

南颿吹雨稚禾苏，惻惻犹劳抱瓮无。须信循良能格帝，岂为旱魃遂焚巫。商羊欲舞频惊翼，坎豕群来已负涂。自是田家成梦稳，开门一望水平湖。

张 镠

甘棠吟

为民忧旱祷星台，走拜冲炎去复来。润物忽飞清夜雨，惊人何用碧潭雷。凭将素履通三极，岂是临祈洒一回。最喜轻尘无着处，一帘爽气到书斋。

孙日炽

甘棠吟

朝天新自九重边，玺诏优褒继昔贤。文学惊能兼政术，郎星合许近台躔。诗书化美开榛莽，襦袴歌深睹惠鲜。看取桐乡千载意，崇祠聿起拂云烟。

张逢宸

观生。崇禎贡生。善草书。

与城东台上阎翁坐语赋赠

翠柏千寻长，幽花五色开。主人无汉后，甲子又周回。客散荒城雨，鸡鸣小院苔。尸乡如欲愧，身世是蓬莱。

挽百岁朱中翁 康熙己酉。

行方貌朴古衣冠，晚翠高松阅岁寒。乡俗饮醇销鄙吝，阶庭昌后长琅玕。荫依正尔瞻梁木，惆怅忽然坠玉棺。最是羊昙痛哭处，悲心忍向西州看。

高蹈谁知城市喧，晚年踪迹寄丘樊。商山芝秀情偏洽，洛社杯浓兴愈轩。须眉童妇皆争睹，偃卧君公自可藩。今日堂封立岳岳，路人犹向拜郊原。

挽朱烈妇

颓纲白日暗生尘，一死真堪赎百身。地下相逢还共笑，颀颜苟活是何人。

刘 湘

子琴。贡生。太仓州学正。万年少先生门人。著有《观海楼集》、《看花集》、《苍桧馆诗》。

登凤塔

济胜尽高层，群山一望了。窗临城阙卑，槛对人家小。长风卷野沙，澄霭织天表。清笛一声来，悠然出木杪。

敬一亭雪中偶成

不恨瓶无酒，喜因雪受寒。过阶双印屐，入户一弹冠。点铛

沸仍白，和梅香可餐。空庭人迹少，白日卧袁安。

以上均见《丰县志》。

李运昌

星阶，号梅岑。同治癸酉科拔贡，举人。有《蔭香书屋诗草》。

陈弢素曰：“先梅岑师致力朴学，束身主壁，为士林重。与弟汝鹤齐名，而文学出其上，遭遇则不之及。著《丰县志》二十卷。”

题王琴九小照

我游东海上，言陟蓬莱山。山中列仙人，意态清且闲。或吹
缟岭笙，或振瑶池环，或骑鲤而赤，或驾龙而斑。一一问姓字，俱
列紫宸班。中虚王乔座，迟立不见还。御空往寻之，西望杳尘寰。
偶憩大彭国，万笏捧城关。城关有佳处，绿天隔市闾。中有一人坐，
科头而朱颜。真气蓄不发，光彩生斑斓。化作双飞凫，时起苍云间。

刘跻堂病足戏赠

东南有刘晨，病足难强步。人问君胡然，我将思其故。或逢
李铁拐，欣然神仙慕。而君旷达者，不为飞升误。或思却子跛，得
邀美人顾。而君须鬓苍，岂复倾城慕。噫嘻我知之，君今实大悟。
道岸已先登，敛足保其素。金紫非所求，捷足让当路。坐啸风月佳，
卧游江山具。可惜六十翁，骨节朽生蠹。一孔如豆开，众恶一齐注。
三薰三沐之，根株犹未露。行如拖翅鹰，立如翘足鹭。截长不可添，
有短不能护。一笑语先生，先生休吃醋。若再访天台，阮肇将先去。

李氏园中龙枣歌

城南散步寻仙岛，金谷荒凉半春草。亭台欹侧卧斜阳，墙根
犹剩龙头枣。我昔曾闻安期生，食枣如瓜东海东。遗核或抛大海

底，至今飞舞学蛟龙。蛟龙出水波涛怒，须臾横空化作树。牙爪森森欲攫人，人来望见先却步。蜿蜒作势拿云烟，云烟缭绕欲升天。春来一夜潇潇雨，满身鳞甲生腥涎。破壁飞来人不见，隔墙邻女惊来看。惹得狂奴意更狂，竟欲乘之游天半。八月秋深结红子，万颗骊珠藏髯底。儿童却立不敢攀，疑是苍龙睡初起。我来摩挲感不禁，头角峥嵘孰赏音。夜深满院松涛响，当风并作水龙吟。

戏马台怀古

英雄得意兴飞舞，神骓驰骤哮如虎。神骓一去不复还，高台犹自传西楚。西楚功名谁不见，学书不成更学剑。喑呜叱咤万人惊，五年身经七十战。七十余战功不成，彭城割据聊纵横。鸿沟已画乌江冷，从此英雄罢力争。吁嗟乎！王霸之分不可假，先机一着争高下。君不见关中豪杰尽从龙，台上将军犹戏马。

放鹤亭怀古

山人养鹤鹤忘机，山人放鹤看鹤飞。鹤飞缥缈不可见，白云拂落山人衣。昏鸦绕树日将晚，缟鹤也自瑶池返。归来不用招鹤歌，认得山亭灯一点。太守城南访隐沦，鹤若蹁跹清路尘。相逢一顾各大笑，鹤竟为官作前导。客来放鹤看鹤舞，西湖深处回轻舫。云龙老屋孤山云，高风两地同千古。

狂风歌

晨起看日日无光，阴云飞走如奔羊。须臾横空霹雳忙，大风突起人惊惶，水波倒卷立如墙。鸡犬无声虎豹藏，鹰隼退飞不敢翔。我于此时意更狂，直欲乘之上穹苍。批开闾阖叩玉皇，何不卷沙飞石下南荒。击彼纵横豺与狼，立为万姓除其殃。不然即将

昏昏世界一簸扬，扫尽尘垢与秕糠。胡为乎独来僧院逞威强，摇我墙壁掀我床，吹我书卷如飞蝗，令我双眸欲张不能张。双扉力拒不能当，得勿风伯之威失其常。玉皇闻之笑且僵，风兮风兮汝难量。此风不击豺与狼，此风不扫尘与糠，只能凭空怒号惊愚盲，拔其树木摧其房，偃其禾黍平如场。汝今遇之勿轻尝，只恐大麓圣人亦苍皇。余也闻之心茫茫，退而自思抚衷肠。御风我曾问蒙庄，雄风我欲迈楚襄。更欲乘风破浪追逐宗子相，颀颀化为鹏背飞上方，大张两翼比天长，力挟此风南海旁，手招折丹来东洋。此风交与汝收藏，不许再来人世施强梁。

荆山桥放舟

解缆长桥下，来乘万里风。船头波影白，蓬背日光红。水势日趋下，乡音渐不同。群山如拱揖，迎我入淮东。

过谷城

日上解寒薄，轻车入乱山。龙原真好少，鸟已倦飞还。尘梦呼应醒，劳生苦未闲。高风忆黄石，仿佛翠微间。

西楚霸王墓

五载兴王业，飞腾绝后尘。能降秦上将，惜失汉功臣。面目惭乡里，头颅赠故人。若论衔壁辱，盖世气仍伸。

春居即事

久自蹉跎数岁华，今年春又到山家。铛中煮茗煎桑叶，村外寻蔬摘柳芽。偶与朋斟金谷酒，闲呼儿种玉簪花。蜗庐差喜尘嚣远，绝少辘辘过客车。

喜雨

谁将愁苦重霄诉，望雨今朝雨即行。膏沐园林增润色，珠跳屋瓦尽欢声。漫天尘垢全收拾，匝地萌芽待长成。我有一亭新构得，不妨名与大苏争。

柳絮

短长亭接短长堤，乱点溪桥衬马蹄。匝地飞绵芳草外，漫天晴雪画楼西。愁逢客路新添鬓，欲悟禅心已混泥。记得当时游赏处，绿阴曾系玉骢嘶。

飞过山桥更水桥，颠狂蜂蝶乱相招。迷人不定风初紧，堕地无声雨未消。落到泥沙仍玉质，开残红紫又花朝。看他点缀溪山景，一幅林峦是白描。

绰约仙人下翠微，步虚吹散雪霏霏。误来篱畔逢蛛网，乱上松梢混鹤衣。流水多情能入化，梨云着色顿添肥。飘零生怕经风雨，得意晴空任尔飞。

夭桃秣李罢前村，缟袂仙仙素质存。万点萍浮终是梦，一年春去此留痕。漫教清白黏泥滓，偶伴飞红落酒樽。已散天花犹绕树，照将别恨恼王孙。

独山远眺 山在昭阳湖中。

孤峰高踞水中流，四面烟峦一览收。斜日送回千点雁，春波绿上几家楼。偶探石壁寻荒碣，闲倚阑干数过舟。到此呼童沽美酿，一樽消却万端愁。

【校勘记】闲倚阑干数过舟：“倚”底本误作“依”，据书末《正误表》改。

九日登城楼遣兴

秋风吹我兴飞腾，直到高楼最上层。于世未酬三大愿，此身可算百无能。功名笑指拖肠鼠，学问仍钻故纸蝇。惟有吟怀狂未减，一声长啸万山应。

观猎

都护城头一夜霜，弓刀小队猎围场。风盘绝塞苍鹰健，箭入寒云白羽凉。万点马蹄飞似雪，半山人影立如墙。将军射得雏雕下，雨血风毛落大荒。

遣兴

也随潘令赋闲居，诗酒生涯廿载余。和靖无心闲放鹤，庄生有乐寄观鱼。安贫不广绝交论，谋食纷裁乞米书。辟谷欲寻赤松子，年来依旧滞吾庐。

闲居杂咏

劫外余生强自延，浙矛炊剑送流年。穴搜狐鼠秋初爽，雨洗兵戈信早传。今岁自三月不雨，至六月骤雨连旬。禾黍幸无悲赤地，牢愁直欲问青天。妖星炯炯摇芒角，起看天狼夜理弦。

【校勘记】浙矛炊剑送流年：“浙”底本误作“渐”，据书末《正误表》改。

问谁高旷问谁迷，世事原难一翦齐。几辈横戈争汗马，有人推枕听荒鸡。无多生计鱼缘木，未断尘根絮着泥。剩有残编堪自遣，闲将今古判高低。

朱陈村

老住林泉学避秦，桃花源外有朱陈。两门风望三唐重，百世

姻缘一里亲。鸡犬自饶此地乐，桑麻不作别家邻。而今景物全非旧，顾陆图来恐未真。

放鹤亭

云龙烟霭郁苍苍，缥缈云端见鹤翔。尽日高飞忘岁月，数声清唳自宫商。山人无俸粮仍蓄，太守能歌酒更狂。亭畔黄茅今长遍，醉冲风雨上南冈。

戏马台

秋风扶我上高台，直挟江东霸气来。六国残疆收掌握，三秦胜业笑尘灰。不容亚父参奇计，可惜淮阴失将才。剩有雄风忆重九，牛羊散卧菊花开。

当年戏马兴如何，铁骑驰驱战伐多。巨鹿任人凭壁垒，鸿沟失计界山河。烟迷三辅消秦帝，风动重围听楚歌。唱到乌江骓不逝，英雄也自泪滂沱。

哭内子 内子蒋氏八月八日捻匪陷城，赴水殉节。

我已余生脱虎狼，坟前空洒泪千行。人间竟有无穷恨，地下难埋死后香。入梦虽非真面目，盖棺仍是旧衣裳。伤心弱女无知识，犹自牵衣问阿娘。

歌风台

万骑长驱返翠华，重来榆社问桑麻。从龙事业资屠狗，逐鹿精神兆斩蛇。西去已符天子气，东来又到帝王家。高歌未罢龙颜醉，满眼河山落日斜。